

հովիտներից մեկի մեջ, բարձր դիրքի վրայ: Ճանապարհին անցանք Մոզուկ գիւղը, որի մերձակայ մորուտների մեջ մի ժամանակ ձգեցին հինգ հարիւր մոզերի գլուխներ, այդ պատճառով եւ կոչոեցաւ Մոզուկ կամ «Մոզաց գերեզման»:

Երեկոյեան կիսամռայի միջից վանքի թանձր, ամրոցածել շրջապարիսպը խիստ ճնշող տպաւորութիւն էր գործում: Ես պետք է մնայի փակուած այդ պարիսպների մեջ: Այդ միտքը անելի ճնշող էր, անելի ծանր էր...

Նայում էի դէպի տասնեւոեց դարերի պատկառելի սրբավայրը, նայում էին դէպի սքանչելի բարձրաւանդակը, որի վրայ կանգնած էր նա, նայում էի դէպի շրջապատող լեռները, որ գրկել էին նրան, նայում էի դէպի կանաչագարդ հովիտը, որ սփռուած էր նրա առջեւ, նայում էի եւ մտածում էի, թէ հայկական գեղարուեստը, ճարտարութիւնը զարգացաւ վանքերի շինութեան մեջ, իսկ հայկական գեղասեր ճաշակը զարգացաւ տեղերի եւ տեսարանների ընտրութեան մեջ, որ վայելուչ էին նրանց կառուցման համար:

Երբեմն մի ամենահասարակ հակադիպութիւն փարատում է մեր սրտից ամենածանր տարակուսանքներ: Ասլանը յայտնեց, որ ինձ պետք է թողնէ այդ վանքում, իսկ ես լռեցի, չյայտնեցի նրան իմ դժկամութիւնը: Բայց երբ, դեռ վանքը չհասած, ճանապարհին պատմեց ինձ դեռ չմոռացուած ավանդութիւնը, թէ այդ վանքում աշխատել են հայկական դպրութեան Ոսկեդարի ականաւոր մարդիկը, թէ այդ վանքի խլութեան մեջ են կատարուել նրանց մտաւոր վաստակները, թէ այդ վանքում են դրուած եւ նրանց պաշտելի շիրիմները, այդ բոլորը լսելով, իմ մտատանջութիւնը ամփոքեցաւ, իմ կասկածները փարատուեցան, եւ ես խոնարհուեցայ անցեալ ժամանակների սրբազան յիշողութիւնների առջեւ՝ աշխատել եւ սովորել այն յարկի տակ, որտեղ աշխատել են մեր բազմավաստակ հայրերը, ոգեւորուել նրանց անմոռանալի շիրիմներով, եւ սրտով ու հոգով նոյնպէս ուսման ճգնութեանը:

Առաջինը, որ հեռուից գրաւեց իմ ուշադրութիւնը, դա էր վանքի շրջապարիսպի արեւելեան կողմում սիւների մի շարք, որ բարձր կոթողների նման կանգնած էին միմեանց մօտ: Ասլանը ինձ տարաւ նրանց մօտ: Դրանք թող տասն գեղաբանդակ խաչքարինք էին, որ դրուած էին քարէ պատուանդանների վրայ: Աւանդութիւնը «Թարգմանչաց գերեզման» Է կոչում այդ լուռ յիշատակարանները: Նրանցից մեկի վրայ ես կարդացի հայոց անպարտելի փիլիսոփայի՝ Դաւիթ Անյաղթի անունը: Այդ խաչքարերի խումբի առջեւ, փոքր-ինչ հեռու դրուած էին երկու անշուք գերեզմաններ. մացառների միջից հագիւ երեւում էին նրանք: Զարացած մամուռը դրել էր այդ տապանների վրայ իր գորշ-կանաչագոյն խաւերը, ոչ գիր եւ ոչ թռական չեն երեւում: